

- Succurrite quantocius,  
Ales perit egregius!
22. Jam longe vulpes aberat,  
Sequentibus spem tulerat,  
Cum gallus prae tristitia  
Init nova consilia
23. Cumque vulgaris cuneus  
Instaret ululatus,  
Conversus ad vulpeculam  
Hanc intulit sententiam:
24. 'Fortuna me destituit,  
Insuper tibi tradidit;  
Si mors non potest dirimi,  
Sit certe vel laudabilis.
25. Te rustici nunc impetunt,  
Rapinae ream arguunt,  
Et nesciunt, quid inclita  
Tua fecit prudentia.
26. Meum sepulchrum asserunt  
Raptricis fore stomachum,  
Promeruisse nequiter,  
Ut hac lacuna conderer.
27. Fit causa, qua calumpnior,  
Ipsa morte molestior,  
Pari dum ignominia  
Te laedit haec infamia.
28. Me pone, quaeso, paululum,  
Et sic affare populum,  
Et quoque dicas tertio:  
"Meum, non vestrum aufero."
29. His verbis expurgabitur  
Quicquid nobis objicitur.  
Hoc mortis aliquantulum  
Repperio solatium.'